

Grammatica vnd Musica / da die wort zierlich vnd künstlich gestellet sind / vnd der gesang oder dohn / süsse vnd lieblich lautet / das da heisst / Schöner text vnd Schöne noten. Sondern viel mehr nach der Theologia / nach dem geistlichen verstand / Da sind die Psalmen recht lieblich vnd süsse / Denn sie tröstlich / allen betrubten / elenden gewissen sind / die in der sunden angst / vnd todes marter vnd furcht / vnd allerley not vnd jamer stecken. Solchen hertzen ist der Psalter / weil er den Messia singet vnd predigt / ein süßer / tröstlicher / lieblicher gesang / wenn man gleich die blossen wort / on noten daher lieset oder saget. Doch hilfft die Musica / oder noten / als ein wunderliche Creatur / vnd gabe Gottes seer wol dazu / sonderlich wo der hauffe mit singet / vnd fein ernstlich zu gehet. Denn so lesen wir vom Propheten Eliseo 4. Ke. 3. das er durch das Psalterspiel (da man freilich Psalmen auff gespielet hat / nach der ordnung Davids) den Geist der weissagung in sich erwecket / Wie auch David mit seinem Psalter spiel / offft den bösen geist Saul veriaget / oder doch hindert oder schwechet / lesen wir 1. Ke. 16. Denn dem bösen geist ist nicht wol dabey / wo man Gottes wort im rechten glauben singet oder predigt. Er ist ein geist der traurigkeit / vnd kan nicht bleiben / wo ein hertz Geislich (das ist / in Gott vnd seinem wort)